



Broj: 01-03-26-022-4- II//10
Sarajevo, 06.12.2010. godine

Na osnovu člana 25. stav 1), člana 42. stav 2) Zakona o konkurenciji („Službeni glasnik BiH“, br. 48/05/, 76/07 i 80/09) i člana 23. i 58. stav 4) Zakona o upravnom postupku („Službeni glasnik BiH“, br.29/02, 12/04, 88/07 i 93/09), rješavajući po Zahtjevu za pokretanje postupka privrednog subjekta Izdavačko preduzeće Sarajevo *Publishing* d.d., Sarajevo, Obala Kulina bana 4, 71 000 Sarajevo, protiv Kantonalnog ministarstva obrazovanja, nauke, kulture i sporta u Vladi Tuzlanskog kantona, Slatina 2, 75000 Tuzla i Kantonalnog ministarstva obrazovanja, nauke, kulture i sporta u Vladi Bosansko-podrinjskog kantona, Višegradska 2a, 73 000 Goražde, radi utvrđivanja sprječavanja, ograničavanja i narušavanja tržišne konkurencije, Konkurencijsko vijeće na 5. (petoj) sjednici održanoj dana 30.11.2010.godine, je donijelo

ZAKLJUČAK

1. Odbacuje se Zahtjev za pokretanje postupka, privrednog subjekta Izdavačko preduzeće Sarajevo *Publishing* d.d., Sarajevo, Obala Kulina bana 4, 71000 Sarajevo, protiv Kantonalnog ministarstva obrazovanja, nauke, kulture i sporta u Vladi Tuzlanskog kantona, Slatina 2, 75 000 Tuzla i Kantonalnog ministarstva obrazovanja, nauke, kulture i sporta u Vladi Bosansko-podrinjskog kantona, Višegradska 2a, 73 000 Goražde, radi utvrđivanja sprječavanja, ograničavanja i narušavanja tržišne konkurencije, zbog stvarne nenadležnosti.
2. Ovaj Zaključak bit će objavljen u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je zaprimilo, dana 16.08.2010. godine pod brojem: 01-03-26-022-II/10, Zahtjev za pokretanje postupka (u daljem tekstu: Zahtjev), privrednog subjekta Izdavačko preduzeće Sarajevo *Publishing* d.d. Sarajevo, Obala Kulina bana 4, 71000 Sarajevo (u daljem tekstu: *Publishing* ili Podnosilac zahtjeva), protiv Kantonalnog ministarstva obrazovanja, nauke, kulture i sporta u Vladi Tuzlanskog kantona, Slatina 2, 75000 Tuzla (u daljem tekstu: Ministarstvo obrazovanja Tuzlanskog kantona) i Kantonalnog ministarstva obrazovanja, nauke, kulture i sporta u Vladi Bosansko-podrinjskog kantona, Višegradska 2a, 73 000 Goražde (u daljem tekstu: Ministarstvo obrazovanja Bosansko-podrinjskog kantona) radi utvrđivanja sprječavanja, ograničavanja i narušavanja tržišne konkurencije.

Uvidom u dostavljeni Zahtjev, Konkurencijsko vijeće je utvrdilo da isti nije kompletan i uredan, u smislu člana 28. stav (1) Zakona o konkurenciji (u daljem tekstu: Zakon), i da nije uplaćena administrativna taksa, u smislu člana 2. tarifni broj 106. stav (1) tačka e) Odluke o visini administrativnih taksi u vezi sa procesnim radnjama pred Konkurencijskim vijećem („Službeni glasnik BiH“, broj 30/06) te je zatražilo dopunu Zahtjeva, u smislu člana 31. Zakona, dopisom broj: 01-03-26-022-1-II/10 od dana 01.09.2010. godine.

Konkurencijsko vijeće, u smislu člana 28. stav (3) Zakona, Podnosiocu zahtjeva je izdalo Potvrdu o prijemu urednog i kompletnog zahtjeva, dana 10.11.2010 godine broj: 01-02-26-022-2-II/10.

Podnosilac zahtjeva opisuje činjenično stanje i okolnosti koje su razlog za podnošenje Zahtjeva, te navodi:

- da je Federalno ministarstvo obrazovanja i nauke Pravilnikom o postupku pripremanja i odobravanja udžbenika, radnih udžbenika, priručnika i drugih nastavnih sredstava za osnovne i srednje škole (u daljem tekstu: Pravilnik), regulisalo proceduru i pravila odobravanja udžbenika i odabira istih u školama;
- da Federalno ministarstvo obrazovanja i nauke svake godine raspiše Javni konkurs za pribavljanje rukopisa udžbenika za određeni razred te da nakon što izdavači predaju rukopise udžbenika angažuje recenzente koji daju svoje stručno mišljenje i ocjenu udžbenika;
- da je članom 21. Pravilnika regulisano pitanje odabira udžbenika na način da članovi stručnih timova nastavnika, u skladu sa svojim iskustvom i znanjem, slobodno odlučuju koji će se udžbenici koristiti, odnosno da nastavnici imaju slobodu odlučivanja pri odabiru udžbenika za vođenje nastave;
- da su Ministarstvo obrazovanja Tuzlanskog kantona i Ministarstvo obrazovanja Bosansko-podrinjskog kantona oduzela pravo nastavnicima da biraju udžbenike i umjesto toga formirali komisije koje odlučuju umjesto njih, od prestavnika devet izdavačkih kuća (koje se bave izdavanjem udžbenika) da biraju samo jednog izdavača koji će biti zastupljen u svim školama navedenih kantona.

Iz svega naprijed izloženog Podnosilac zahtjeva smatra:

- da Ministarstvo obrazovanja Tuzlanskog kantona i Ministarstvo obrazovanja Bosansko-podrinjskog kantona svojim postupanjem narušavaju slobodno tržište i stvaraju monopol, te krše odredbe Zakona i traži od Konkurencijskog vijeća pokretanje postupak protiv istih.

Iz opisa činjeničnog stanja je vidljivo da su procedura izbora i formiranja tijela nadležnog za izbor udžbenika kao i njegov sastav regulisani drugim propisom (Pravilnikom Federalnog ministarstva obrazovanja i nauke) a ne Zakonom o konkurenciji, te shodno tome Konkurencijsko vijeće nema nadležnost da odlučuje o tom pitanju.

Na osnovu izloženog Konkurencijsko vijeće je ocjenilo da stvarno nije nadležno, te je odlučilo kao u dispozitivu ovog Zaključka.

Pouka o pravnom lijeku

Protiv ovog Zaključka nije dozvoljena žalba.

Nezadovoljna strana može pokrenuti upravni spor pred sudom Bosne i Hercegovine u roku od 30 dana.

Predsjednik

dr. Stjepo Pranjić